

Placi Jacomet
CR 1976 pag. 408



Probabel ein ils avdonts da Surrein buca ual quels dalla veta tgunscha. Surrein ha buca mo runtga e tschespet darschalaun, mobein era la spunda sulegliva dil Claus ed il fil dalla cresta entochen si Foppas. La casa osum sin la costa ei la casa paterna da Placi Jacomet, leu nua ch'el e siu frar Vigeli e la Nescha, la sora adoptiva, ein carschi en ina cumpignia sempla e bufatga. Sco quei ch'ei fuva magari usitau da lezzas uras, il bab veva num Leci ed ins scheva all'entira feglialonza semplamein ils Lecis. E la noda fuva s'enfirmida tondanavon ch'ins ha ora ed ora detg il Placi dils Lecis. Jeu fuvel in buobetgel e vadler e pertgiravel nov vadials sils Neidis. Sin scala-crap avon casa sun jeu s'entupaus cun el. La plipart dalla puraglia spel dutg fuva ora sil trentin e nus, nus vevan da vender ina buccada mughera. Suenter il marcau ha il Placi tunschii il maun al bab sco da nundir ch'el stetti buns per quei ch'el ditgi. Jeu vess cartiu senza ch'el detti il maun, damai ch'il Placi resplendeva ina segirezia quietonta.

Siu bab, il Leci dalla Castgina, lez fuva in pign proprietari. A Surrein ha il Placi empriu da tener casa, da preziar il funs magher e stantiv. Ei drova energia e perseveronza dad ir agradora per la via dalla vertid; persuenter ein las stagias sper la via ton pli curteseivlas. Ils pli datier ed ils vischins ein morts d'ina mort sereina e consolonta. E la cardientscha digl um dils rovens ei vegnida statteivla, quei che ha tuttavia buca impiediu el silsuenter da far carriera.

Cun quei impuls eis el vegnius da Surrein a Sedrun ed ha ensemblamein cun siu frar Vigeli cumprau ina casa sper via ed il funs dils Mugglis. Ses principis da viver fuvan serius, aschia ch'il Placi Jacomet ha surmontau l'entschatta fadigusa. El ei scochemai daventaus in pur respectau amiez il vitg da Sedrun. Habels sco el fuva acquista igl um enina l'attenziun dils vischins. Il sezs han eligiu il Placi salter e cassier e gerau, essend ch'el dumignava exemplaricamein siu fatg e veva e talien pigl uffeci public. Ils onns buc, quels onns nauschs d'avon l'uiara epi l'uiara sezza, dils 1939 entochen ils 1945. A casa ina famiglia numerusa che veva basegns dil bab, in smugl da menaschi e suren il survetsch activ. Mo cun ferm curonta onns ei igl um sils sumfils dalla veta ed el resca e damogna in bien ton. Placi Jacomet impunda siu temps e stat a disposizion als vischins.

Tschuncheismas 1943, la tscharna da president communal ei biala. Placi Jacomet semetta els stadals, spargna e tegn adaquen perfin ils da tschun. Ils projects gronds dalla vischnaunca da Tujetsch ston vegnir refretgs, refretgs sils onns grass. Dus biennis davontier.... e las tschaveras fuvan meinsvart ualti stuffias. Igl ei zaco iu pli lev, cunquei che sia consorta, la Zia, ei segidada bein cul mariu. Problems da correspondenza hanada saveva el ver endamen cun ella, la dunna. Las brevs dattan lavur ed ei capeta ch'ins scriva nuidis.

Ils anno 1951 vess il Placi saviu dir da na. El fuva en spir forza e surpren danovamein il tgamun dalla vischnaunca e diregia ella quella gada per ver quater biennis. Il quitau per il plaz da lavur ed in'existenza per ils vischins han fatg semarmenir il patratg d'ir alla tscherca da novas resursas. La radunanza da vischnaunca dils 13 da fevrer 1955 ei memorabla. Suenter biaras resalvas e tgisas tut a dubel concedan ils vischins da Tujetsch da vender lur auas alla NOK. Il president e ses geraus, che vevan fatg lavur da biestg, registreschan success. Perbia buca tut ei stau bein fatg. Nuvs e nuvs ein vegni suenter el petgen. La damonda, schebein ins vessi saviu prevegnir da quei u tschei maungla ins affirmar. Priu ch'ei seigi buca stau in veritabel pegliasis, generalmein ston ins conceder ch'ei seigi endretg. Perqueilein nus buca sminuir ils merets, oravontut ils merets da president Jacomet. En vesta dallas entradas ha il pievel da Tujetsch astgau entscheiver a trer in tec flad. Ils vischins da Rueras survegnan ina nova casa da scola. Ins quenta ferm da realisar ils ulteriurs plans ch'ein sin rucca.

Sco segn d'engraziament portan ils umens da Tujetsch lur president sco derschader circuital. Anoviars ha el forsa mai dau tier, en sesez veva el denton giu plascher giidlunder. El, il Placi Jacomet, che saveva numdadiu buca ir cun quei ch'el senteva sillla palmamauna.

Il mument ch'el ei ius sco president pudeva ins nuota spitgar cun las propostas per in niev. Placi Jacomet ha surris ed ei ius per siu fatg senza canzuns e ghirlandas e poesias. El ei turnaus a semetter cun omisduas ella stuera dil menaschi puril; ed el ei gleiti secumblidaus vi ch'ins veva munchentau da dar agli las arbagias. Ils davos onns tuttavia, il sezs ein stai tgeus e da gronda meditaziun.

Ch'el ruaussi bein e retscheivi la pasch ch'el mereta.

Vic Hendry

En memoria da Placi Jacomet anteriur president communal da Tujetsch



Avon entgin temps ha Placi Jacomet, anteriur president communal da Tujetsch, priu comiau da quest mund. Sia gronda lavour prestada per la communidad mereta ina menziun en quest liug. Il defunct ei naschius ell'ucliva da Surrein, igl onn 1896. Suenter las scolas da vischnaunca sededichescha el al puresser, al qual el ei staus fideivels sia entira veta. Cun ver 30 onns han el e siu frar Vigeli d.p.m. acquistau a Sedrun ina casa ed in pulit fatg puril. Suenter sia maridaglia secasa el leu. Il mument ch'el ei staus el centrum ein ils vischins beingleiti vegni pertscharts da sia savida e capacitat. Allas elezioni da vischnaunca vegneva siu num adina puspei proponius. Bein deva ei certs criticasters che levan buca confidar in uffeci ad in «andersé» (Andersässiger). La famiglia Jacomet era num-nadamein burgheisa da Mustér. Quella mentalidad deplorabla era aunc ualти derasada da lezzas uras. Aschia grevan vischins ina gada, ch'els lessien buca scalins jasters, cura ch'in «andersé» candidava per igl uffeci da president. — La pluralitat dils vischins ha denton buca schau tschorventar da quels arguments nunfundai ed han surdau al Placi in uffeci suenter l'auter. Igl emprem ha el funcziunau sco salter e suenter sco statalter (cassier). Pli tard eis el s'avanzaus a vicepresident e 1943 agl uffeci da president communal ch'el ha administrau entochen 1947. Suenter la mort prematura da Hans Decurtins

han ils vischins danovamein confidau ad el il tgamun communal ch'el ha menau cun maun franc e dicidiu da 1951 entochen 1959. En quels 12 onns sco cau d'ina gronda vischnaunca ha ei dau gronda lavour e buca pigns quitaus e fastedis. Alla entschatta regeva ei aunc crisa e scartezia era tier la vischnaunca. Adina puspei vegneva ei sesprau dad anflar novas resursas per levgiar ils vischins e la vischnaunca.

Finalmein ei quei reussiu: Ils 13 da fevrer 1955 decida la radunanza da vischnaunca da conceder l'utilisaziun dallas auas alla NOK Baden. Quei pass ei staus d'impurtonza decisiva per la vischnaunca da Tujetsch. La decisiu ha denton buca saviu vegnir prida dad in di sin l'auter. Ella ha basignau nundumbreivlas radunonzas e trac-tativas davart dalla suprastanza e dalla cumisiun d'aua. Il pli grond engaschi en quellas preparativas, per part hanadas, ha segir Placi Jacomet prestau. Malgrad ch'el haveva buca gudiu pli gronda scolaziun, capeva el oreifer da menar radunonzas e da contrahar cun signurs e delegaziuns. Quei era pusseivel sin fundament d'in dun politic, denton era da seriusa preparaziun. — Sche la vischnaunca da Tujetsch ha oz bunas resursas finanzialas, ha ella d'engraziar in bien ton per quella favur a siu anteriur president communal.

Suenter la memorabla radunanza da vischnaunca, menziunada avon, han las finanzas communalas saviu vegnir sanadas e projects daditg sin rucca realisai. In da quels ei la nova scola a Rueras che Placi Jacomet ha menau ad ina bona fin.

Il defunct ha era mess sias forzas a disposizion ordeifer la vischnaunca. Da 1955 entochen 1961 fa el part dalla dertgira circuitala da Mustér. Havend el las qualitads da mistral, proponan ses vischins el igl onn 1959 per quei uffeci. Denton el ha buca giu la cuida. —

Suenter ses uffecis ei Placi puspei s'occupaus dil puresser. Culs onns eis el vegnius pli retratgs. Sias forzas han entschiet a svanir. Ina maldispostadad ha mudergiau el in per onns. Denton, quasi surura ha il bien mariu e bab ed il respectau um dalla politica priu comiau da quest mund. Nus debitein era en quest liug in grond engraziament per tut siu prestau. Siu exemplu seigi a nus in muossavia! Allas famiglias en malencurada exprimin nus nossa sincera condolentscha.

In collega